

太原縣志卷之七

寓賢

太原多山水之勝四方來遊者輒流連不忍去齊之楊愔唐之李白其尤著也歷代以來每多名蹟備書之以致仰止之思焉志寓賢

漢

第五倫字伯魚京兆長陵人自以久宦將家屬客河東變名姓自稱王伯齊載鹽往來太原上黨所過輒爲糞除而去

孟敏鉅鹿人客居太原荷甑墮地不顧而去或問之敏曰

太原縣志

卷之七

寓賢

一

甑已破矣顧之何益郭林宗異之勸令遊學十年知名三公俱辟不就

魏

楊俊字季才河內獲嘉人受學陳畱邊讓以河內處四達之衝避地并州

晉

周虓字孟威其先汝南安城人遷廬江少有節操寧康初領梓潼太守爲符堅將楊安所獲堅欲以爲尚書郎不受後謀襲堅事泄堅引問狀虓曰昔豫讓爲智伯臣猶漆身吞炭不忘忠節况虓世荷晉恩耶堅撻之徙於太

原

北魏

辛紹先隴西狄道人徙家晉陽與廣平游明根范陽盧度世同郡李永承等相友善先是蓼泉之戰父淵死於難紹先三年口不甘味頭不節沐髮遂落盡至是常著垂裙皂帽太和十三年卒

崔子約清河人休子悛弟性孝長八尺餘姿神雋異常潛觀梁使劉孝儀寶從見者駭目武定中與兄子瞻俱詣晉陽寄居佛寺子瞻長子約二歲每憑几相對儀望俱華後爲考功郎卒

太原縣志

卷之七

寓賢

二

北齊

楊愔字遵彥宏農華陰人正光中隨父之并州性恬默好山水入晉陽西懸壺山讀書

盧公順范陽涿人胡后舅正山子早以文學見知武平中符璽郎待詔文林館從駕晉陽寓居僧寺

隋

崔躋字祖濬博陵安平人性至孝博學善文開皇中射策高第大業四年從駕幸晉陽宮登太行山詔問躋曰何處有羊腸坂對曰臣按漢書地理志上黨壺關縣有羊腸坂上曰不是又答曰臣按皇甫士安撰地書云太原

北九十里有羊腸坂上曰是也因謂牛宏曰崔祖濬可謂聞一知二

唐

張平高綏州虜施人隋末爲鷹揚府校尉戍太原爲高祖所識因參謀議封蕭國公

李思行趙州人嘗避仇太原高祖將起使覘長安還具論機變深稱旨授左三統軍

李高遷岐州岐山人隋末客遊太原高祖常引之左右擒高君雅王威有力焉從平霍邑戰功最著

張後允蘇州崑山人父冲有文學從父在并州以學行見

太原縣志

卷之七

寓賢

三

稱時高祖鎮太原引居賓館太宗就授春秋左氏傳

尉遲敬德朔州人初從宋金剛後降唐累功封鄂國公謚忠武有別墅在晉祠

崔從字子乂清河武城人少孤貧與兄能偕隱太原山中力學會歲飢拾橡實以飯講誦不輟貞元初登進士立朝稜稜有風望卒贈司空謚貞能亦授嶺南節度使

李白字太白嘗遊并州見郭子儀奇之子儀犯法白爲救免集中若太原早秋及晉祠流水如碧玉等詩知白在太原夏秋易季歲月滋深晉祠尤爲亟遊地云

裴休字公美聞喜人歷官太原尹北都畱守河東節度觀

察等使性寬惠爲官不尚皁察而吏民畏服嘗隱居白雲迎福寺

歐陽詹字行周泉州晉江人貞元八年進士客太原有旅懷呈薛十八侍御齊十二奉禮詩又陪太原鄭行軍中亟登汾上閣詩見行周集

五代

趙玉薊州漁陽人客滄州依節度判官呂袞劉守光破滄州收兗親屬盡戮之兗子琦年十四玉負之以逃至太原變姓名丐衣食以給琦當時燕趙之士以玉能存孤翕然稱之清泰中琦爲端明殿學士玉已卒矣子文度

太原縣志

卷之七

寓賢

四

入洛舉進士琦薦於主司馬裔孫擢科甲

桑維翰身短面長嘗臨鏡自奇曰七尺之軀不如一尺之面慨然有志於公輔初舉進士主司惡其姓與喪同音人有勸其改業者乃鑄鐵硯示人曰硯敝則改後以進士及第嘗於馬坊山讀書舊有祠堂今廢

李瓊字子玉幽州人幼好學涉獵史傳唐莊宗募勇士瓊杖策詣太原應募與周祖等十人約爲兄弟周祖與瓊情好尤密每謂瓊爲師及討河東乃解瓊兵籍令參西軍事累官安州防禦使民立碑頌德

宋

歐陽修號醉翁晚號六一遊晉祠採金石遺文著集古錄
蘇過軾子嘗遊太原天龍寺有詩石存

金

王庭筠字子端河東人生未期視書識十七字七歲學詩
涿郡王修期以國士登大定十六年進士第任恩州軍
事判官臨政有聲明昌間讀書黃華山寺因以自號嘗
遊太原遍歷天龍諸山之勝有紀遊詩四首自書四大
幅筆法奇逸後人鐫勒於石摹搨者無虛日詩見藝文
張中孚字信甫侍父張遠守太原金宗翰圍太原遠戰歿
中孚泣涕請迹父尸乃獨率部曲十餘人入金軍中竟

太原縣志

卷之七

寓賢

五

得尸還

劉宣字伯宣其先潞人以出戍畱居忻金末徙大原宣沉
毅清介居家孝友喜讀書有經世之志宣撫張德輝雅
重之

元

忒木台扎刺台人太宗時嘗駐軍太原土人德之皆爲立
祠

明

張文明字應奎陽曲人官御史武宗幸大同文明上疏切
諫乞斬江彬謫電白典史世宗卽位召復原職寓居太

原縣之大王村今其子孫皆占籍焉

羅洪先字念菴吉水人嘉靖己丑狀元爲時名臣晉祠聖
母廟壁題詩云懸甕山中一脈清龍蟠虎伏隱眞明水
漂火劫山移步五十年來帝母臨後題戊午羅洪先懸
筆書法飄忽迥不類人間筆墨順治間邑令郜煥元摹
勒石

國朝

顧炎武字寧人號亭林長州人博極羣書所著曰知錄博
綜精當實有經濟非徒以考据見長也嘗遊太原與閻
若璩考究古義與陽曲傅徵君爲方外之交時人高之

太原縣志

卷之七

寓賢

六

朱彝尊字錫鬯號竹垞秀水人於書無所不窺工著述舉
博學鴻詞除檢討纂修明史與王阮亭齊名凡五至晉
祠題詠甚多

吳雯字天章號蓮洋安邑人早孤躬耕奉母家貧力學以
工詩受知王阮亭舉博學鴻詞嘗兩至晉祠有詩見藝
文

傅山字青主其先忻州人寓陽曲久因隸籍焉諸子百家
靡不淹貫詩歌古文詞及字學尤其所長甲申後棄諸
生自稱石道人嘗寓太原今城內小西街尙有別業人
稱爲傅家大門云

楊爾禎黃州人僑居晉祠兩弟被賊執爾禎請代弟縛賊
義而釋之

太原縣志

卷之七

寓賢

七